

Na osnovu člana 26. stav (1) tačka b) alineja 8) i stav (2) Zakona o plaćama i naknadama u institucijama Bosne i Hercegovine („Službeni glasnik BiH“, broj 50/08) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 82. sjednici, održanoj 2.aprila 2009. godine, donijelo je

ODLUKU

o kriterijima za utvrđivanje dodatka na plaću na osnovu obavljanja složenih informatičko-aplikacijskih poslova u institucijama Bosne i Hercegovine

Član 1.

(Predmet Odluke)

Ovom Odlukom propisuju se kriteriji za utvrđivanje dodatka na plaću zaposlenim s visokom školskom spremom na osnovu obavljanja složenih informatičko-aplikacijskih poslova u skladu sa članom 26. stav (1) tačka b) alineja 8) Zakona o plaćama i naknadama u institucijama Bosne i Hercegovine.

Član 2.

(Definisanje složenih informatičko-aplikacijskih poslova)

- (1) Složeni informatičko-aplikacijski poslovi koji se odnose na održavanje i razvoj upravljačkih aplikacija u institucijama Bosne i Hercegovine su:
 - a) upravljanje i projektovanje procesa i upravljačkih aplikacija:
 - 1) upravljanje projektom – projekt menadžment,
 - 2) upravljanje analizom poslovnih procesa,
 - 3) analiza poslovnih procesa – poslovna analiza (Business Analytics),
 - 4) upravljanje razvoja aplikacijskih procesa,
 - 5) upravljanje testiranjem aplikacijskih procesa;
 - b) projektovanje i razvoj procesa i upravljačkih aplikacija:
 - 1) razvoj aplikacijskih procesa,
 - 2) projektovanje arhitekture sistema,
 - 3) projektovanje aplikacijskih procesa,
 - 4) projektovanje baze podataka;
 - c) implementacija procesa i upravljačkih aplikacija:
 - 1) instalacija aplikacijskog softvera,
 - 2) instalacija sistemskog softvera;
 - d) testiranje procesa i upravljačkih aplikacija:
 - 1) testiranje aplikacijskih procesa;
 - e) obuka korisnika:
 - 1) kreiranje dokumentacije projekta,
 - 2) obuka korisnika;
 - f) održavanje procesa i upravljačkih aplikacija:
 - 1) održavanje aplikacijskog softvera,
 - 2) održavanje sistemskog softvera.
- (2) Pored složenih informatičko-aplikacijskih poslova utvrđenih u stavu (1) ovog člana kao posebna kategorija složenosti utvrđuje se i jedinstvenost radnog mjesta. Jedinstvena radna mjesta su radna mjesta koja zahtijevaju posebne obuke za zaposlene s visokom školskom spremom vezano za obavljanje složenih informatičko-aplikacijskih poslova, koji se odnose na održavanje i razvoj upravljačkih aplikacija primjenjivih samo u jednoj instituciji Bosne i Hercegovine pa se takva stečena znanja ne mogu koristiti ni u jednoj drugoj instituciji Bosne i Hercegovine niti na tržištu.

Član 3.

(Postupak podnošenja prijedloga Odluke o dodatku na plaću)

- (1) Budžetski korisnik je dužan uz prijedlog Odluke o dodatku na plaću dostaviti validne certifikate i obrazac koji obvezno sadrži sljedeće podatke:
- naziv sistematizovanog radnog mjesta u instituciji;
 - opis poslova koji se obavljaju u okviru sistematizovanog radnog mjesta;
 - popis validnih certifikata, kojima se obrazlaže posebna stručna osposobljenost za obavljanje složeno-informatičkih poslova iz člana 1. ove Odluke, a koji su utvrđeni opisima poslova i zahtjevima radnog mjesta prema pravilniku o ustrojstvu i sistematizaciji u konkretnim slučajevima.

Član 4.

(Provjera i klasifikacija certifikata)

- (1) Ministarstvo finansija i trezora procjenjuje prihvatljivost priloženih certifikata iz člana 3. ove Odluke i klasifikuje iste prema kriterijima iz člana 2. ove Odluke.
- (2) U cilju osiguranja većeg stepena pouzdanosti procjene validnosti certifikata Ministarstvo finansija i trezora može angažovati stručnjake i tražiti objašnjenje od institucija koje su izdale certifikate kao potvrdu posebne stručne osposobljenosti za obavljanje složenih informatičko-aplikacijskih poslova vezanih za održavanje i razvoj upravljačkih aplikacija.

Član 5.

(Vrijednovanje složenih informatičkih-aplikacijskih poslova)

- (1) Složenim informatičko-aplikacijskim poslovima, u zavisnosti od stepena njihove složenosti i posebnosti, pripada maksimalan broj bodova prema sljedećoj tabeli:

Oznaka	Složeni informatičko-aplikacijski poslovi	Broj bodova (BB _{k_i})
k ₁	Upravljanje i projektovanje procesa i upravljačkih aplikacija	15
k ₂	Projektovanje i razvoj procesa i upravljačkih aplikacija	12
k ₃	Jedinstvenost radnog mjesta	10
k ₄	Implementacija procesa i upravljačkih aplikacija	9
k ₅	Testiranje procesa i upravljačkih aplikacija	9
k ₆	Obuka korisnika	9
k ₇	Održavanje procesa i upravljačkih aplikacija	6
	Ukupan broj bodova	70

- (2) Dodjela bodova za određeno radno mjesto vršit će se na osnovu sljedeće formule:

$$BOB = \sum_{i=1}^7 BBk_i, i = 1, \dots, 7$$

gdje je:

- BB_{k_i} – broj bodova složenog informatičkog posla k_i koji obavlja osoba koja se ocjenjuje, a prema tabeli iz stava (1) ovog člana;
- BOB – broj osvojenih bodova za obavljanje složeno informatičkih poslova za određeno radno mjesto.

- (3) Postotak dodatka na plaću u zavisnosti od broja bodova za određeno radno mjesto izračunava se prema sljedećoj jednačini:

$P[\%]= 0$, za $BOB \leq 6$
 $P[\%]= BOB$, za $6 < BOB < 50$,
 $P[\%]= 50$, za $BOB \geq 50$

- (4) Ukupan iznos bodova za jednog zaposlenog po jednom kriteriju iz tabele utvrđene u stavu (1) ovog člana ne može preći maksimalan iznos iskazan za taj kriterij bez obzira na broj validnih certifikata koje zaposleni posjeduje.

Član 6.
(Provođenje Odluke)

(1) Na osnovu odredbi ove Odluke budžetski korisnici će sačinjavati i dostavljati Vijeću ministara Bosne i Hercegovine na usvajanje prijedlog Odluke o dodatku na plaću zaposlenim u institucijama Bosne i Hercegovine u skladu sa članom 26. stav (2) Zakona o plaćama i naknadama u institucijama Bosne i Hercegovine.

(2) Ministarstvo finansija i trezora na osnovu ove Odluke daje mišljenje vezano za utemeljenost prijedloga i visine dodatka na plaću na osnovu obavljanja složenih informatičko-aplikacijskih poslova u institucijama Bosne i Hercegovine.

Član 7.
(Stupanje na snagu)

Ova Odluka stupa na snagu osam dana od dana objavljivanja u „Službenom glasniku BiH“.

VM broj 77/09
2.aprila 2009.godine
Sarajevo

PREDSJEDAVAJUĆI
VIJEĆA MINISTARA BIH
dr. Nikola Špirić